

TEZĂUR LITURGIC
1 SEPTEMBRIE

ACATISTUL
SOBORULUI
SF.NOI MUCENICI
ȘI MĂRTURISITORI
AI
ȘATURSKULUI



MOSCOVA, 2000



Акафист

СВЯТЫМ НОВОМУЧЕНИКАМ И ИСПОВЕДНИКАМ Шатурским

Кондак 1

Избранныи новомученицы и исповедницы Христовы, небесных жителей пресветлая дружино, от земли Шатурския возсиявшии и в Небеснем отечестве венцы славы приемшии! Прославляюще прославльшаго вас Господа, песнями духовными восхваляем вас, заступники наша. Вы же, яко имущии дерзновение ко Святей Троице, от всяких нас бед свободите, зовущих:

Радуйтесь, новомученицы и исповедницы Шатурстии, житием и подвиги светло просиявшии.

Икос 1

Ангелов Творец и Создатель человеческого рода во дни грозного испытания земли нашея яви вас, страстотерпцы Шатурстии, людям страждущим образ твердаго стояния в вере и

дарова вам благодать мужественне подвизатися и даже до крове пострадати. Сего ради, поминающе подвиги ваша, благодарно вопием вам сице:

Радуйтесь, святии, на страдания Богом призваннии;

радуйтесь, страстотерпцы, подвиг добре совершившии.

Радуйтесь, новых мучеников и исповедников священное сословие;

радуйтесь, горних небожителей преславная дружино.

Радуйтесь, новозакланнии агнцы, жизнь свою за веру положившии;

радуйтесь, в лице мучеников Христу, Агнцу Божию, на Небеси предстоящи.

Радуйтесь, новомученицы и исповедницы Шатурстии, житием и подвиги светло просиявшии.

Кондак 2

Видя свирепство зверонравных гонителей, святитель всероссийский Тихон призва верная чада стати на защиту святыя матере Церкви и,

аще послет Господь испытания гонений, уз и мучений, и самая смерти, претерпети вся, на подвиг взирающе древних мучеников. Вы же, святии, последующе гласу сему, мучения добре претерпели есте, воспевающе Богу: Аллилуиа.

Икос 2

Разумом не разумевающе, сердцем зело болезновали есте, страстотерпцы, како земля Русская, удел избранный, мраком безбожия помрачися и грехом Каинова братоубийства осквернися. Темже, о разорении любезного отечества зело скорбяще, зывали есте: Воскресни, Господи, помози нам и избави нас имене Твоего ради. Мы же, исполнение молитв ваших зряще, ублажаем вас сице:

Радуйтесь, сонма страдальцев земли Русския украшение;

радуйтесь, подвига мученического новое сияние.

Радуйтесь, за Русь Православную изряднии молитвенницы;

радуйтесь, к Богу о ней приснии печальницы.

Радуйтесь, светильницы света, в всех Шатурских светло возсиявшии;

радуйтесь, страдальцы святии, подвигом мученичества Христа прославившии.

Радуйтесь, новомученицы и исповедницы Шатурстии, житием и подвиги светло просиявшии.

Кондак 3

Силою Вышняго укрепляеми, пастырие доблии, стадо Христово, от беззаконных терзаемое, в любви и единомыслии соблюдали есте и, противу гонителей мятежных подвигом веры добре подвизающесе, козни их нивчтоже вменяли есте, глаголюще: страха вашего не убоимся, ниже смутимся, яко с нами Бог! Мы же, подвиг ваш мученический восхваляюще, Богу вопием: Аллилуиа.

Икос 3

Имуще разум злочестием потемненный, восхотеша пребеззаконнии гонителие единство церковное разорити руками скверных вероотступник и лжепастырей. Обаче ничтоже успеха, яко не воздремаша очи страстотерпцев на стражи веры Православныя, ниже умолкоша уста их, во еже всяк совет нечестивых разорити

и верных во истине укрепить. Мы же, дивящиеся
подвигоу их, взываем сице:

Радуйтесь, учений апостольских изряднии
ревнителие;

радуйтесь, веры отеческия твердии
хранителие.

Радуйтесь, суемудрие нечестивых
дерзновенно обличившии;

радуйтесь, злохитрость и коварство их
низложившии.

Радуйтесь, в нощи безбожия светом истины
возсиявшии;

радуйтесь, за веру Православную добре
подвизавшиися.

Радуйтесь, новомученицы и исповедницы
Шатурстии, житием и подвиги светло
просиявшии.

Кондак 4

Бурею злобы противу Церкви дышуще,
нечестивии безбожници храмы и обители
святыя разориша, вас же, святии
страстотерпцы, крова и пристанища лишиша.
Обаче, благодатию Божиею укрепляеми, вся

благодушно претерпели есте и, о мучителях с любовью молящся, Богу взывали есте: Аллилуиа.

Икос 4

Слышавше безбожнии гонителие твердое ваше исповедание, злобою распаляхуся на вы, страстотерпцы, и, многоразличными муки терзающе, от места на место изгоняху, в темницы и на горькия работы заключаху, голодом и хладом изнуряху. Вы же, святии, терпение стяжавше, рекли есте: кто ны разлучит от любви Божия? Сего ради, дивящся мужеству вашему, со умилением взываем вам сице:

Радуйтесь, древним мучеником житием и подвиги подражавшии;

радуйтесь, мученицы новоявлении, добродетельми светло просиявшии.

Радуйтесь, в броню правды облеченнии;

радуйтесь, щитом веры огражденнии.

Радуйтесь, Церкви Русския благодатное прозябение;

радуйтесь, земли Московския похвало и украшение.

Радуйтесь, новомученицы и исповедницы Шатурстии, житием и подвиги светло просиявшии.

Кондак 5

Богосветлии звезды, ко Христу путеводящи, явистесь, новомученицы святии, в нощи гонения безбожного сияюще. Вас бо прещения мучителей не устраиша, ниже темницы мрачнии потаиша, но свет ваш просветися пред человеки. Мы же, видяще ваше доброе исповедание, прославляем Отца Небесного, взывающе: Аллилуиа.

Икос 5

Видевше, яко властителие беззаконнии многия верныя в темницы заключаху и на мучение и смерть осуждаху, вы, святии, разуместе, яко приспе время и вам подъяти страдания за веру Христову. Темже тепле молили есте Господа, да укрепит вас в подвиге страданий и прославит Имя Свое. Мы же, воспевающе исповедание ваше, вопием сице:

Радуйтесь, жребия мученическаго не уклонившиися;

радуйтесь, в руке Божии себе всецело предавшии.

Радуйтесь, путем Христовым добле шествовавшии;

радуйтесь, мучения многообразная безропотно терпевшии.

Радуйтесь, Царствия Небеснаго победно достигшии;

радуйтесь, сладости райския богато вкусившии.

Радуйтесь, новомученицы и исповедницы Шатурстии, житием и подвиги светло просиявшии.

Кондак 6

Проповедницы всеобщаго Воскресения и жизни вечныя явистесь, новомученицы святии, земная бо вся отвергше и живота не пощадивше, веровасте, яко тела ваша, аще и предани будут поруганию и тлению, обаче в нетлении и славе востанут. Ныне же в Небеснем Иерусалиме и Церкви торжествующих вкупе со ангелы и всеми святыми воспеваєте Судии всех Богу победную песнь: Аллилуиа.

Икос 6

Возсияша светозарно добродетели ваша,
всехвальнии мученицы Христовы, вы бо в
точиле лютых гонений, яко гроздия Истинныя
Лозы, кровь свою источили есте, еюже Церковь
Святая украсися, яко багряницею и виссом.
Сего ради прославляем вас сие:

Радуйтесь, винограда Христова гроздие
многоплодное;

радуйтесь, вертограда Небеснаго цветы
прекраснии.

Радуйтесь, покровом Божия Матере
осененнии;

радуйтесь, щитом благодати Ея огражденнии.

Радуйтесь, в Небесных чертозах радостию
наслаждающиися;

радуйтесь, зрением Сладчайшаго Иисуса
утешающиися.

Радуйтесь, новомученицы и исповедницы
Шатурстии, житием и подвиги светло
просиявшии.

Кондак 7

Хотяще богоборцы суемудреннии веру Православную во Отечестве нашем искоренити, совет сотвориша, еже вся пастыри верныя избити и овцы стада Христова разсеяти. Сего ради руки на вас, святии мученицы, возложиша, беззаконному суду предаша и на смерть осудиша. Вы же, чашу страданий испивше, Христу последовали есте, воспевающе: Аллилуиа.

Икос 7

Новая Голгофа явися в земли Московстей на месте, нарицаемом Бутово, идеже новии мучители, древним в лютости подобящися, поведоша вы, страстотерпцы всехвальнии, яко агнцев на заклание и люте умучиша. Аще же и предаша святая телеса ваша безчестию и поруганию, обаче Господь вас прослави пред ангелы и человеки. Мы же, дивящися долготерпению вашему, сице вопием:

Радуйтесь, веры Православныя славнии провозвестницы;

радуйтесь, любви Христовы истиннии причастницы.

Радуйтесь, надежды несумненные
приемницы;

радуйтесь, премудрости Божия поборницы.

Радуйтесь, кротости и незлобия стяжателие;

радуйтесь, воздержания истиннаго учителяе.

Радуйтесь, новомученицы и исповедницы
Шатурстии, житием и подвиги светло
просиявшии.

Кондак 8

Странно и чудно есть разумети, како святые
жены, естеством немощни, мужески за Христа
пострадаша? Видевше бо честные отцы и
братию, на муки и смерть осужденные,
подвигом оных подражаху и Христа
небоязненно проповедаху, воспевающе Ему:
Аллилуиа.

Икос 8

Весь еси желание, весь сладость, Сладчайший
Иисусе, - сие зывали есте, преподобные жены,
и на мучение, яко к венцу брачному, с радостию
потекли есте. Егда же смерть от рук
беззаконных приясте, душами чистыми, яко
голубицы белокрилыя, в Чертог Жениха Христа

воспарили есте. Сего ради примите от нас похвалы сицевыя:

Радуйтесь, агницы пречистыя, Христу с любовью пожершыяся;

радуйтесь, страстотерпицы пречудныя, Небесному Жениху сочетавшыяся.

Радуйтесь, мудрости евангельских дев подражавшыя;

радуйтесь, во свете веры чисте пред Богом ходившыя.

Радуйтесь, обеты иноческия даже до смерти непорочно соблюдшыя;

радуйтесь, мужески страдания и смерть претерпевшыя.

Радуйтесь, новомученицы и исповедницы Шатурстии, житием и подвиги светло просиявшии.

Кондак 9

Вси святии Церкви торжествующия с радостию сretoша вы, новомученицы Шатурстии, яко победители, присныя други Христовы и достойная чада Царствия Его. Темже, почеть Горняго званія приимше, с

благодарностию взываете Богу, Победителю смерти, хвалебную песнь: Аллилуиа.

Икос 9

Витийство человеческое не может по достоянию прославить подвиги и страдания мучеников и исповедников Христовых. Мы же, зряще вас, страдальцы земли Шатурския, славою и честью от Бога увенчанных, подвиги вашими назидаемся и, помощи улучшить чающе, дерзаем с любовью воспевати вам сие:

Радуйтесь, стопам древних мучеников
небоязненно последовавши;

радуйтесь, лютое неистовство беззаконных
мужественно обличивши.

Радуйтесь, воины добропобеднии, добле за
Христа подвизавшиися;

радуйтесь, страстотерпцы славнии, кровию
мученическою землю Русскую обогривши.

Радуйтесь, страданьми и исповеданием в
Небесная селения вшедши;

радуйтесь, в белых ризах Агнцу Божию во
славе Небесней предстоящи.

Радуйтесь, новомученицы и исповедницы Шатурстии, житием и подвиги светло просиявшии.

Кондак 10

Спасения нашего усерднии ходатаи есте, новомученицы всехвальнии, сего ради молим: испросите нам у Господа утверждение в вере и благочестии, да, не падше и обленившеся, но бодрствующе и трезвящися, все время живота нашего потщимся в смирении, целомудрии и братолюбии пребывати и за вся Бога благодарити, взывающе Ему: Аллилуиа.

Икос 10

Стена неборимая явися безбожным гонителем твердость ваша, святии новомученицы. Вы бо, звероподобного нрава тех не убоявшеся, на судищах, в заточениях, горьких работах и всяких скорбных обстояниях образ терпения и непостыдного упования на Бога мужественне явили есте. Сего ради прославляем вас сие:

Радуйтесь, добропобедницы, подвиги вашими Православие утвердившии;

радуйтесь, крепцыи поборницы, гонения
безбожных нивчтоже вменившии.

Радуйтесь, прехвальнии исповедницы,
богопротивную власть дерзновенно обличившии;

радуйтесь, агнцы незлобивии, жизнь свою за
Христа положившии.

Радуйтесь, христолюбцы, веру истинную
дерзновенно исповедавшии;

радуйтесь, друзи Божии, сладости райския
присно вкушающии.

Радуйтесь, новомученицы и исповедницы
Шатурстии, житием и подвиги светло
просиявшии.

Кондак 11

Пение хвалебное усердно приносим вам,
новомученицы Шатурстии, и чтим честная
страдания ваша, вы бо, любве ради Божия, вся
земная нивчтоже вменивше, души своя за
Христа положили есте. Ныне же, в Небесных
обителях пребывающе, вопиете Богу: Аллилуиа.

Икос 11

Светом трисиянным осияваемы,
новомученицы Шатурстии, со всеми святыми

предстоите ныне Небесному Царю и, яко светила светозарная, присно просвещаете души притекающих к вам с верою и любовью. Мы же, благодаряще Бога, дивнаго во святых Своих, прославляем вас сице:

Радуйтесь, тесным евангельским путем шествовавшии;

радуйтесь, узкими враты Небеснаго Царствия достигшии.

Радуйтесь, вся прелести мира и славу его нивочтоже вменившии;

радуйтесь, благодать врачевания душ и телес от Бога получившии.

Радуйтесь, достойнии Небеснаго Царствия наследницы;

радуйтесь, усерднии о нас пред Богом молитвенницы.

Радуйтесь, новомученицы и исповедницы Шатурстии, житием и подвиги светло просиявшии.

Кондак 12

Благодать, данную вам от Бога, ведуще, память вашу с любовью совершаем,

страстоперпцы Шатурстии. Паче же умиляемся, како вы в годину всеобщаго отступления, до конца вся претерпевше, всем сердцем Господа Бога возлюбисте и ближняго, яко сами себе. Помозите убо и нам сия заповеди исполнити и крест свой безропотно понести, со благодарением взывающе Богу: Аллилуиа.

Икос 12

Поюще славныя подвиги ваша и твердое стояние в вере, крепцыи воины Христови, величаем долготерпение и ублажаем святую кончину вашу. Вы бо, лютых мучений не убоявшеся, тела ваша, яко жертву непорочную, Триединому Богу принесли есте и от Него, почестъ Горняго званія приемше, ликостояния со всеми святыми в ризах белых достойни явились есте. Темже примите от нас похвалы сия:

Радуйтесь, любве Христовы истиннии проповедницы;

радуйтесь, Царствия Небеснаго достойнии наследницы.

Радуйтесь, беззаконных мучителей смирением победившии;

радуйтесь, любовь евангельскую страданием запечатлевший.

Радуйтесь, незлобию Христову добре подражавший;

радуйтесь, образ веры и благочестия нам явивший.

Радуйтесь, новомученицы и исповедницы Шатурстии, житием и подвиги светло просиявший.

Кондак 13

О, святии новомученицы и исповедницы Христовы, земли Шатурския похвало и славо! Приимите сие малое моление наше, с благодарностию вам приносимое, и предстательством вашим ко Господу испросите Отечеству нашему мир и благоденствие. Нам же, всем, даруйте веру непостыдну и любовь нелицемерну, да, в покаянии поживше, Царствия Небеснаго сподобимся, идеже купно с вами и всеми святыми воспоем Богу хвалебную песнь:Аллилуиа.

Сей кондак глаголи трижды. Посем икос 1 и кондак 1.